

四庫全書

集部

欽定四庫全書

文忠集卷一百六十七

泛舟游山錄

宋 周必大 撰

一卷起乾道丁亥三月盡是年六月

乾道丁亥三月丙申招陳允中為成媼診脉

闕

丁酉初報謁

闕

乙巳晴北風微作申時過隆興府遣人致問帥漕有餽
皆却之晚泊鰕魚潭夾中

丙午無風以從者有潛入隆興城中者候至巳時方行
晚泊吳城山廟下登望湖亭春水未生涯渚歷歷松門
巡檢詹億之保義巡捕某至此來謁億之嚴州人頃在
賴識諸父

丁未舟人賽廟畢解去自此入湖掠珠溪神岡左里廟
皆不泊湖中多沙山望之如雲廬阜青蒼真欲招隱未
後次南康軍簽判趙無悔相訪別適周歲矣借虞兵陳
宣前導出西門諸峰橫陳瀑布中瀉寒食節遊人布路
約十餘里至開先寺長老不在同西堂元湛上漱玉亭
觀石柱間東坡辛巳四月題名開先舊屋惟有此亭其
上即石橋又其上瀑水落焉瀦為龍潭旱歲祈禱頗應
回觀僧堂即南唐玄宗少年書堂也古碑一空魯直院

記偶存耳寺之東山別有小瀑號馬尾泉其餘境物之
勝僧徒皆不能言要當按陳令舉之記以決旬搜訪或
可得其四五耳飯罷日已落急命車南訪歸宗寺由寂
簡觀路口以遷僻不果入行官道約十里將至寺先渡
鸞溪橋酌一滴泉躡支徑過水磴循溪源有大池縱廣
十丈梵護皆以石又其上則石鏡溪聞刻魯直三大字
曠黑不能視獨題歲月於王龜齡待制詩碑後溪上直
紫霄峰鉄塔在焉村民以二三月一往採茶約十里云

自此即架石渠導水長至二百丈最為奇特此外舊物
稀矣秉燭入寺在金輪峰上霄峰之下上霄者秦始皇
漢武帝所登也長老名縱閩人同謁王右軍塑像觀墨
池又有鵞池恐偽南山至此已十八九尚有康王觀谷
簾泉在一二十里間遂轉山北入江州界矣隔路別峰
號黃龍是為湯泉有寺幾廢云縱作果供二鼓就寢今
日之遊雖忽忽而籃輿中徧觀山面所得為多恨不能
詩以識之

戊申聞五更鐘即蓐食以火炬夾車而行初雨無從假
蓋已而稍止萬彩院天始明頃經焚蕩尤貧乏同長老
上散珠亭即舊滴翠亭也觀仁宗飛白清淨和尚等字
及勅劄數通錢易王隨王欽王曙章得象諸朝王送僧
太超詩太超乃天聖中開山者內侍羅崇勲主之太守
史奉直致問雨復作亟過棲賢路稍崎嶇然不妨觀山
也約十餘里至山峽橋蘇黃門所記殆非夸詞恨不遇
積雨怒漲時耳下視橋柱余靖元絳皆刻姓名自此行

石衢至玉淵亭澗水披石陟落漚為龍湫雪濺雷吼不減三峽又數十步乃至寺山林陰翳棟宇零落如蹈無人之境升其堂長老妙微方出嘉州人也同至五老亭古碑多罹於火而祖無擇愛堂銘獨存堂在金萊圃後僅存階梯按記文唐寶曆初李渤捨宅為寺云聞數里有楞伽折柱李常公擇山房有其妹墨竹廸不能往出棲賢行十里得官道入羅漢院雖免火厄而主者非其人坐觀推敗畧不支惟藏殿尚如舊內外皆石柱刻龍

統之承平時民財既富濟以國力應如此又十里入北
門謁太守而歸星子令鄧從政思問相候并致谷簾泉
酒無悔送廬山前後集江行圖欲登落星寺而衆客在
岸應酬移時日已過未遂解去癸酉冬嘗遊此寺今以
其咫尺反忽之不無遺恨晚泊女兒港是日清明以卮
酒勞從者

已酉早昏霧辰後方解而北風作過大孤泊黃泥狀登
岸汾港入飯籬山民居風不止退泊樟義港口林江州

栗遣人致問頃之風稍息行數里浪勢未平家人輩驚怖復掛颿回樟議昨日若遇此天氣則以留落星再遊廬山矣

庚戌浪不可行坐巖石間觀劉賢與舟人奕

辛亥雨作風稍緩行至湖口縣江湖合流浪勢甚大縣在上下鐘石之間不暇為蘇仙之遊也過里許攔頭一葉舟趕白浪襲稅方與從者閑而江州使者再至乃去進至交石夾上口登岸望桑落洲步上夾石監廟邵

迪功端程部信綱相訪故戶部侍郎與可之子戊戌年
家也以南康谷簾泉遺之未後風止舟人云西江浪未
平不果行有欲烹河鮓者買而縱之夜月極佳

士子鷄鳴解纜風復作已時過彭澤縣縣在南岸亂山
連延不斷而此岸惟小孤山突起雖有水非江中大也
馬當遠望如馬亦在南岸上元水府廟樓閣華煥不能
謁欸未後入望江夾望江舒州縣也舟人云前無住口
岸遂止

癸丑未時次雁議鎮隸池州風色既退檢稅者又不至
遂宿焉携兒遊東山禪院長老惠曰

甲寅風益高入長風夾遇淺回旋久之未後過羅刹石
浪轉高掛颿回泊李王河口李王謂玄宗也登洲上閒
步有民居及巡檢司

乙卯早昏霧辰後方行未時次池口去州數里舟師以
幹乞留風忽轉南得未曾有張颿行僅二十里雨作復
轉北風乙夜疊棹入梅根港百家之聚也大風

丙辰大風雨登岸謁昭明太子行宮步至市尾有梁達
字通卿教村童携酒與之飲頗能道九華勝槩漁舟數
百出沒大浪中皆捕河魴者

丁巳霧散晴掠銅陵縣入丁家夾以風逆命挽而進晚
未出夾數里止官軍數十輩駐泊岸上有老黥謝錫字
子京亦聚數村童携酒飲之

戊午早掠繁昌縣以風靜不入夾中流而下過蕪湖縣
望礪磯在江心泊舟登寧淵觀寂無一人屋皆朽敗前

對三山左即邑屋青墩夾出焉觀張安國舍人題字而
回過西夾閘數舟簸旗鳴鼓而至皆和州截稅者久之
方去晚過西梁山泊大信口二百餘戶夜扣萬壽解院
已未早行夾中欲入太平州以水澁復出江已初刻過
采石鎮已卯秋嘗登牛渚磯今不暇晚乃泊鷺頂

庚申早以夾中水澁轉江而入未後泊新河口此行日
日北風今日近流趨新河便值南風所向背馳如此折
簡韓無咎及運使催舟載行李入鎮江間

辛酉南風益熟方帥滋務得葉總領衡夢賜韓無咎及
莊德全權貨蘇常山並相訪辭以徑過不果報謁有餽
皆却之常山仁仲之子務德甥也行李易舟挈家遠城
過天禧寺治大行計漕司急足特先牌與名客趙倅善
仁紛爭甚久趙故人也醉之故新太平州推官趙儒林
不沒長老知勤並相訪都統劉源致餽亦却之

壬戌早發天禧行十里田間有南唐追封慶王廟王李
姓松名字弘茂神道碑韓熙載奉勅撰午飯後至株陵

鎮謁嶽廟有道士止之晚宿方虛訪陳特立秀才

癸亥早飯畢至漂水縣知縣王彥平及主簿張修職思
新主簿王迪功尚之尉張迪功南仲相候於門入泊中
山驛紹興戊午李朝政修登登為之記趙倅分路赴闕
殊愧前失而僕未嘗過之也晚赴王彥平飲後圃有池
周美成作邑時短句云新綠小池塘謂此園無花而多
古木有連理

甲子女兄小祥就驛設祭而行飯官塘晡時至黃連步

登秦氏小舫是日天氣頗蒸鬱晚雨作中夜大雷遇客
舟橫港衡破籃輿紛競不已遂泊

乙丑大雨午後止昨日道中苦旱得雨良幸過溧陽縣
宰陳朋元蒼尉時迪功作人相訪乘便風度湖滄達宜
興歸家來迎方知外舅以二月十九日不祿魯子師之
子相訪

丙寅晴遣賴昌如臨安問兩兄動靜

丁卯新沂東安撫司機宜汪端中恪新鎮江分差糧料

院強中新監左藏西庫剛中懔將仕郎張仲益並相訪
三汪皆彥章子

四月朔戊辰雨聞日當蝕至吳墟謁周敦義參政已拜
泉州

庚午宜興丞葉宣義節新監通州鹽場俞秉義儔仁仲
相訪宣義蘊之孫永州太守程之子秉義君莊氏甥也
辛未謁同年莊伯威知錄及其父德成新主管臨安城
北右廂邵宣教軺相訪

癸酉賴昌持兩兄書歸再遣行程君曄及地理僧真鑒
大師淨如來

甲戌顯親長老全顯招飯辭之再至吳墟

乙亥邑中迎社頗盛云周孝侯生日也聞孫仲益尚書
艤舟北郭謁之年八十七矣精明如六七人詩文不
減少作談舊事纚纚不勑可謂異禀

丙子外舅終七

丁丑客云汪彥章與王甫太學同舍甫貌美中空彥章

戲之為花木瓜及彥章罷符寶郎甫正當國以宣倅處之宣州產花木瓜故也

戊寅復至吳墟別泉州

己卯新國子監主簿沈德文相訪

庚辰早詣臺莊祭奠外祖墳守者改用毛百一稍禁樵蘇通判舅氏墳在其西二三十步植兩石楠以為識禮畢與仲賢淨如會於莊子平資福院遂拜其墓相去半里蘇子修秀才墳庵又一里有孫觀復庵極潔雅回視

莊德邁及蔣氏所出陰地道過莊德固墳庵自此問歸
路去縣數里有余公度邵知縣胡省幹三庵相望又落
路觀慕容彥逢尚書家墳稍已廢圯有尼庵主之敲其
門不應從者頗聞虎嘯回趨孫端朝汝翼安撫墳庵少
休其規模如小寺歸憇宋氏店黃昏到家雨作

辛巳莊支使璵相訪飯罷因謁郭宅心寺丞遂遊通真
觀比癸未益不振向餘一拍又復不存庭下有虞察院
詩刻云此樹已三百年而數歲間俱失之庸道士之罪

也聞是日呂洞賓生日

癸未早仲寧仲賢過善權設水陸齋約同登舟風水俱
逆其行甚緩晡時掠桐渚晚望楊氏墳庵頗壯麗由小
港登焉方墳闕角僭侈非度自此至寺纔數里乃肩輿
以行過離墨山最高或謂與善權通號離墨云稍前即
董山岡碑在焉欲上而日已落徑入善權勅額曰廣教
初龍圖閣待制傅揖興化人嘗為徽宗端邸官僚既死
援王陶例未至執政特賜功德院而不改廣教之額揖

墓在寺側其羣從亦有依寺而居者按舊碑寺本齊武帝贖祝英臺莊所置山東北有石壇號九斗壇世傳梁武帝禱雨於此會昌廢寺田產歸鍾離氏咸通八年鳳翔節度使李勣奏云臣太和中嘗肄業此寺由巖洞有白龍之異願以已俸贖田復舊詔可之其碑并勣詩尚存仍畫像以祀南唐時嘗為道觀後主復為寺宣政間傅氏子狗時又請為崇道觀建炎間復舊單氏圖經云殿屋乃廬州刺史張崇造寺多唐人題名今獨乾符以

來塑匠役人姓名班班可見殿柱上有雷部鬼書曰駱
審火者一謝鈞火者二字皆倒書予往視之不見所謂
唐匠姓名及駱審火字其謝鈞火入木寸餘又有詩米
等字皆遒勁可愛客館巖石奇秀瀦水為池頗立亭宇
於其上壁間有元豐甲子秋九月彭城劉彛執中夜宿
寺中追懷陳襄述古詩云精識世稀及直道古難有哲人
雖云亡遺德不可朽嘗厭石渠遊是邦爰出守浚河納
湖波股派活畎畝學宮起城隅塗人或薪稊既富而教

之薄俗適忠厚矧予平生時昏弱賴磨操共探姬孔微
肯出臯稷後醇源浩罔涯實行靡容苟逝甘老岩阿寂寞
待同扣天乎奪大成旅茲宜興阜我來難荆榛雨淚滴
杯酒慟哭起秋風落葉分林數永懷三益恩語報之瓊
玖願子生人間世世為親友古人於交遊情誼蓋如此
述古墓去寺十餘里州博士歲遣生員祭奠

甲申晴宜興人謂克時夏雨甲申而致九年之水故甚
畏之早同仲寧及地理僧淨如過丁墅卜地去寺約二

十里飯於吳寺丞庵回至懷相塢入吳秀才庵少休天氣驟熱將至善權由傳公神道繞寺後訪二洞約行里餘度小嶺乃至焉乾洞在上有大石當戶其四周髣髴數疊牆竇蓋下垂鶯管懸綴有鹽堆米堆惟肖視張公洞差小然亦可容千人水自山出未至洞口披石斗瀉漚而為湫細流入洞中石田皆成疆畔每丘繞盈又高高下下水滿其中石文蘂花草如雕鵬者陳述古詩云陰陽融結此山川便有鹽堆與石田風俗每來占水旱

却疑乾洞有神仙注謂乾洞中有鹽堆米堆石田數丘
鄉人歲時祈禱以占水旱若田中有水即為豐年之兆
又詩云水洞深無百尺田白龍騰蟄已多年誰知此物
能雲雨常濟山南萬頃田注謂圖經云水洞中有泉大
旱不竭常有雲氣升騰白龍出於洞中予觀石田在水
洞而述古乃言於乾洞不知何故白龍即李贛所見者
水既入洞即伏流達寺中昨日所謂巖石亭宇正臨其
上時有四足鮎魚出遊村夫或擊而食之今日童僕輩

亦見之者水由寺而出灌溉之利遠矣遊洞畢回視傅公家乃歸是日茶毗長老正祥其死方數日病後端坐書偈而逝云寺在宜興西南陸行四十里舟行六七十里張舜民南遷錄過黃州聞東坡云近復一魚似鮎而有四足能履地而行或曰鯢魚也

乙酉早肩輿二三里至董山按三國志金陵實錄孫皓因國山有石立遣司空董朝太常周處封禪刻石埋銀龍銅馬其下石如圀故俗呼圀碑山高數十丈與徐宗

策杖同登碑字三面可辨惟東向剝裂模糊蓋無屋以庇之也俗呼董山謂董朝也碑詞載所遣官姓名而無周處史氏誤矣長老法濟齋罷登舟歸邑初行十里四望塵沙漲天既入湖滄西北風大作浪湧舟駛逼暮方方到家賴昌等報七兄銓試中第二

丙戌開啓天申節

丁亥宜興尉趙修職希仁新鎮江簽判胡通直詰審言相訪再遣賴昌傳勝如臨安連日雨寒

戊子赴莊德邁飯

己丑報謁數客皆不值獨遊會真庵而歸

庚寅大風而晴早同仲寧仲賢如師再出南門卜地一里許曰畫店二三里入山門蓋自此入山地南來諸山聚於陽羨界太湖而止對縣治號銅棺山一日君山尤峻拔故此邑多富貴之家是日飯莊氏資福庵晚飯莊子權雨華庵其間溧陽埭邵氏之淨觀庵莊子和霜露庵蔣子禮祖母沈夫人靜照庵言村王朝奉庵惟霜露

草草餘皆雅潔閣敞新丹陽丞沈從政宗契王仁傑秀
才相訪

辛卯王德華蒞自崑山過溧水經由相見

壬辰早約莊德邁飯訖泛舟數里至言村訪胡茂老松
年樞密舊居榜曰萬幅平邑遠人第呼橫山堂堂去湖
泮繞百餘步湖外峰巒橫陳又其外遠山如屏方茂老
卜築時陸藝花木水植荷蓮死纔二十一年皆堙廢不
治而第宅浸壞予甲戌歲嘗與外舅其舟欲來大風而

止今日亦遇風雨

癸巳新烏程丞祝宣教溥相訪飯罷入縣學學遍南門
對湖山按碑記真廟朝縣宰李若谷立廟仁宗朝鄭氏
彛修學紹興十六年又修今浸弊無一青衿其傍即社
壇韓无咎寄龍元英文昌雜錄

甲午早同仲寧仲賢淨如出南門過橫澗入袁氏庵觀
地投宿洞靈觀知觀邵惟道字集虛極有幹才支傾補
弊觀遂復興登裴公洞中路回望太湖宜築小亭焉山

非甚大而洞極廣蓋一山背空耳其間肖像不一而數
柱若擎之者

乙未早過湖狀鎮跨溪有橋號侍郎橋或曰謂陸希聲
而圖志頗疑其稱呼不相應也飯於金沙寺登願山訪
講易臺酌潛虬泉皆希聲遺跡也寺有岳飛已酉歲留
題刻石詞甚壯遊李福墳庵即李顯忠斬之者入鎮中
觀潛泉仲寧兄弟同淨如過山中觀地予乃與道士王
見志字全隱者遊惠氏南園久之過北園仲寧兄弟至

遂買舟泛湖狀而歸兩岸多朱藤故號卷畫溪歷唐貢
山淨如云唐貢茶之舍也又過冢山蠡湖甲夜抵邑中
五月朔戊戌姚媼忌辰過顯親設供仲寧招胡審言素飯
寄孫暫從慕容邦瑞學

己亥赴汪疆中會於莊氏萬頃樓

庚子新靜江倅鮑夢符新宜春丞王從政渙新廣德司
法趙修職公鑒新會稽主簿趙修職公植並相訪趙氏
兄弟克之之子是日借汪氏舟省從母而東南風大作

不可過溪橋宿於岸步出小蓮

辛丑早行風不止微雨過沙子為前舟阻滯踰兩時橫
拖而進晚宿塘楊方

壬寅端午節早雨午後次常州泊州橋過章茂之知錄
廳留連至夜同坐乃其宗人興祖字慶善明脉州牌徐
鉉書甚奇

癸卯早移舟過東門登嶽廟入薦福禪院陳瑩中作記
偶免兵火觀音堂極高爽或云東坡賦紅梅閣即此也

邂逅白沙蕭岳英在此權攝同觀錢俶開寶九年五月
金書法華經當時共捨二十通今僅存五卷光明如新
鄉貢進士蕭鴻武進丞李德明紹來謁蕭生犇牛人與
岳英同寓寺中又同岳英過天慶觀修廊頗嚴整殿背
有李其畫雙龍歲月侵久勢欲騰拏蓋名筆也道正房
植虞美人花狀類雙魚色如金鳳其葉與牡丹無異又
過太平寺之彌陀院觀徐陟水壁波濤隱起毗陸所工
之藝也老僧守稠云東坡元祐六年三月二十八日過

寺賦詩云醉中眼纈自爛班天雨曼陀照玉槃一朵官

黃微拂殺靺紅魏紫不須看

右淨土院牡丹

六花簷蔔林間佛

九節菖蒲石上仙何似東坡鐵拄杖一時驚散野狐禪

右華藏院蓓蕾

其碑近為何提幹者取去晚赴茂之飯遂宿其

廳復移舟泊州橋

甲辰早撐舟至天喜橋肩輿勝業寺三門自唐碑叙寺

本陳果仁宅西廊已壞東廊僅存又東入觀音講院僧

云陳祠邇遂同往門列三碑其一唐天寶中記文元和

間立其一刻大業十一年果仁告身并其妻捨宅疏其
一近世太常博士夏之文為太守周祀修新廟作記廟
廊數十間周祀毀貢院而為之按果仁字世威本州人
隋朝屢平劇盜唐武德三年為降將所毒妻軫氏以宅
為寺而廟食自唐已盛屢加封爵南唐保大間冊為武
烈帝俗傳五月八日生新廟之後有鎮武殿又其後乃
神之舊殿像為方面不甚大或曰真身也殿前檜樹殆
數百年之物歸舟少休復度橋訪胡武平功德院院乃

武平創造治平元年七月請額曰感慈報恩遺令不許
子孫祔享止祀其三代故羣從不得擾之堂有二板壁
東坡草書侔杭和陳述古二詩其一自有美堂乘月夜
歸所謂娟娟雲月稍侵軒者其一過周長官夜飲所謂
二更鐃鼓動諸隣者經崇觀磨洗今粗可辨初在門廡
近徙置堂上蔣燦題其後對壁又刻元豐八年五月二
十七日東平孟震遊寺留題復刻頌云碧玉盤盛紅瑪
瑙井花水養石菖蒲批風抹月晨齋罷試問禪師得飽

無其上別刻二頌一與上同而改後一聯云也知法供
無窮盡只問禪師得飽無一同集本只改請為憑師觀
前輩於小詩猶潤色不一愈改愈勝故私記於此長老
名無礙而集中不書堂上及僧堂皆畫水活勢不減彌
陀院者頃之出廣化門里許觀武平墓庵中有歐陽公
所撰神道碑宣和間訪孫集褚書而成之其額則集顏
書字夫右丞父瑩相去不遠初武平間其弟死自京師
貽書族長云某處地葬後出兩府吾弟有子可當之謂

宇夫也其後果驗此帖今藏胡氏武平於天文地理無
所不通而其父子及宇夫父子塚兆相望皆葬平地凡
俗所謂來山去水皆不可與而武平復先視其貴賤
而後與地諺有山頭堂上之說信不誣也今胡氏子孫
祿仕數十人中間世闕交脩又亞政塗與蔣穎叔家並
為此邦甲族何其盛哉午間赴葛家之會其居鄒志完
諸子之居近買之晡後出門中夜抵無錫縣

乙巳午後至許市登法華庵望陽山在數里間下有澄

照寺今為岳右丞功德院其傍龍母廟頗靈異頃歲嘗
至焉晚抵平江入閭門泊北寺尋徙承天能仁寺觀銅
佛圖經云梁陸僧瓚捨宅為寺中有聖姑廟蓋陸氏女
今號惠感夫人郡人祈子頗驗頃之章濟之運幹來同
游從母宅戊寅之別今十年矣章氏甥楊昉叔明同宿
丙午唐致遠判院來闕壻也

丁未赴范至能吏部會李全自廬陸來永和諸位武義
臨安諸兄皆有書

己酉早同濟之明叔致遠遊虎丘圖經云山在長洲縣
西北九里一名海湧山上有雲巖寺真娘墓劍池飯罷
謁陳省華王禹偁葉參蔣堂畫像歷東西庵歸過半塘
寺朱長文續圖經云虎求寺即普東亭獻穆公王珣及
其弟珉之宅寺前有高僧竺道講堂生公立片石作聽
徒折松枝而為談柄其虎跑泉陸羽井見存

庚戌王仲謨仲告仲顯自崑山來至普門禪院謁之景
德中日本僧寂照嘗居此舊刻朝宰諸公送行詩今亡

長老師璨約唐致遠及仲謨昆仲過萬壽禪院素飯并
招范至能長老蘊衷癸未歲住經山識之萬壽本丁晉
公祖守節造今號報恩光孝寺乃平望刹也

辛亥藥局林修之極相訪

壬子仲謨兄弟歸崑山謁張漢卿推官顏休之省幹獨
遊北禪院主者惠深住數十年一力新之十六觀甚嚴
潔圖經本戴顓宅

甲寅赴張漢卿會約為天池之遊

乙卯早別從母登舟同濟之至崇真宮相別於閭門范
至能顏休文相別於門外致遠聯舟繞城望姑蘇館而
過八里至橫塘入般若寺又數里至董山法雲寺陳國
長公主及石駙馬葬堂上寺之軒窓皆可眺望登塔一
級山峻窄而止謁峰高下相連如筆格山又數里過木
瀆鎮遂至靈巖解院村民磔蝦蟆可閔以錢二千市千
二百縱之呼筍輿上山半有憩亭由支徑訪西施洞今
為石龕塑像佛回視已見太湖按吳越僧智賢乾德三

年所作智積記云圖志言闔閭城西硯石山高三百六十丈在吳縣西三十里闔閭宮苑琴臺響屨廊館娃宮復有硯池玩花池明月池山前十里香徑梁天監二年置寺十五年有僧自畫梵相於佛殿壁間後有西天僧見之云此智積菩薩也餘文不錄舊號靈巖秀峰院今韓世忠請為功德院長老善鄉來同自響屨廊過草堂上琴臺下視川原華麗太湖數百里在眼中致遠置酒勝集堂傍有圓照禪師塔塔臨石池即硯池也故此山

號硯池山近地別有礮村其石可作硯及器用堂上望湖邊兩山相對東曰胥山西曰香山其中曰胥口故老言香山產香堂下平田之中有徑直達山頭西施自此採香故一名採香徑亦云箭徑言其直也或云由此投伍員尸故有胥山胥口之名香山西北連穹窿山湖中山之大者有東西二山皆號洞庭山餘多島嶼云夜待月望湖光然後就枕頃年嘗同章茂之兄弟劇飲於草堂濯足偃松間中夜方寢今日之樂又過昔遊所惜偃

松一枝已瘁至能走介送熏香松黃新茶其簡云來日
登天平須攀援至遠公亭及諸石屏處白雲泉名在水
品其色凝白蓋乳泉也張又新以虎丘石井在第三松
江在第六而此泉未知如何試一別向壽老欲作亭泉
上及別築遠公亭而范氏媼居寺中擾之遂止寺右上
山路傍有石龜極形似

丙辰早以香茶供智積殿周行寺宇惟倦於登塔乃吳
越平江節度使孫承祐為光國妃所造成於太平興國

二年丁丑歲猶未納土今一百九十矣鄉老具飯人力
輩能鼓笛徑呼而奏之登諸天閣烹至能雪液步至後
門觀大井其徑丈餘正東望崑山縣百里皆平田惟一
山突起蓋縣郭之馬鞍山山寺在焉東北連山其長常
熟縣之虞山也自此升小車過天平下嶺甚峻約數里
至白雲寺圖經云唐寶曆二年置在縣西南二十五里
本遠公道場今為范文正公功德院義倉在其中文正
公父祖葬山下故范氏多寓傍近或居寺廊寺有白樂

天蘇子美王君玉蔣希魯詩刻久闕主僧庶事不治欲
同致遠登山而脚力頓疲頗難之然思至能簡中語恐
遺恨他年遂奮衣右轉而上酌白雲泉甚白而甘躡石
磴至卓筆峰峰高數丈截然立雙石之上附着甚臬兀
疑其將墜如屏如矗或挿或倚脩極奇怪行十之七石
愈衆而力愈疲乃循左徑訪石室三面壁立覆二大石
少休其中下至小石屋一石覆之又下至飛來峰高二
丈上銳削微附磐石前臨崖谷茲其異也又東下遠公

庵一名望湖臺正值寺後今廢又下至五丈石亦名閣
石上至次頭陀巖有葢斜蔽之次至龜石拳勢隱起名
不虛得此山大抵皆石也環形詭狀可喜可愕今日造
疲倦又當暑不能窮其巔然郡人能至予之所至者寡
矣寺僧呼歸寺欲拜文正公及四子像坐待魚鱗移時
乃至明日葢文正忌辰云寺有明因塔院詰曲隨山殊
迫窄初僧智華與蔡京善政和間為乞此額且立碑焉
茶罷即行過晨臺山大石特立進至腸嶺道傍有曾敗

彦和父墓碑未百年已荒敗又度賀家嶺大石如橫案
上立兩石俗云嶺皆有新婦石此其箱篋也午飯王份
知縣墳庵份吳江耀庵主人也未時至張漢卿天池庵
漢卿相待久矣按圖經吳縣西六十里曰華山半由絕
頂而上有大池晉太康中嘗產千葉蓮花今池在山半
未知是否漢卿於此營墓就隱負崖為屋鑿徑穿洞疏
水四達其間種梅藝菊以待游人費益不貲然山石粗
礧殊乏秀潤晚置酒更好亭亭在池上酒闌肩輿過燕

窠山觀魏氏山地入魏奉議志庵右過北峰禪院其實
魏侍郎憲之庵規模倣寺而為移廢額於此入門久之
一僧方出侍郎公死纔三十年其後寢衰矣歸宿天池
丁巳早飯罷同漢卿致遠行三里至張唐卿排岸庵庵
後大石間有輓雲亭皆人力也自此度廟嶺並華山凡
數里至朱右丞諤永慕庵瑩城頗侈蓋蔡京當國與諤
善勅葬故也又數里至陽山下望田間一辟邪甚古不
知何人墳耕夫云近之輒有峰螯人陽山吳郡之主人

也有元居實者紹興間掌市骨董於擁場坐致高貲今
為平江總管陽山既橫鶩乃大興土工築支龍為生墳
其傍起塚舍雖濶軒亦極甃砌之工門外栽花木數千
株屈折以勢不知靡金錢幾萬緡矣又二三里度老鼠
嶺入張齊賢承節庵與漢卿小飲而別同致遠扣魏迪
功庵過黃峴嶺遂至白馬澗舟人已來與致遠酌一杯
各解維去以陸務觀所送車渠環遺漢卿吳郡惟城西
多山起黃山盡陽山兩日幾徧歷夜宿望亭

戊午天申節食時回次無錫縣登崇安寺古碑東晉安
帝時立近歲經兵火方造三門佛殿有僧義深善醫多
貲造五輪藏甚華又過南禪泗州大聖嘗留賜杖有碑
記其事比創五百羅漢閣謂之泛海羅漢蓋閩人為之
航海而來也張婺州元亮相訪

己未早訪劉醫即義深也元亮約飯目疾大作不能赴
遂同過慧山具蒲饌慧山乃寺之主山而錫山在寺前
不甚高摹陸鴻漸碑汲泉烹茶佛殿下古松可愛太上

辛巳冬過此勅近寫真尋即枯瘁晚去縣四十餘里宿
庚申早過常州蕭岳英立談而別目疾益甚正坐從母
宅劇飲過量且冒暑遊山故也晚宿沙子口

辛酉食後抵宜興目疾不能出客至亦不能見

丙寅平江守姚令則直閣憲遣使致洞庭春冷泉酒書
箱十餘種是月六日國史院進呈哲宗寶訓一百門六
十卷并目錄二卷有旨經修而在外者減二年磨勘而
予預焉

六月朔丁卯外舅卒哭祭

己卯莊德邁送溪鱗此日目赤稍退而脾胃怯弱百物皆忌偃卧榻上無聊可知前興國梅山福盛長老大悅至自無錫仲寧招之卜地也

戊子邵至卿運使相訪自閩改湖南而歸也目赤雖去而翳暈生

己丑新吳江宰邵宣教輓及其弟新秀州司理輜相至卿之子

庚寅初伏便覺酷暑聞吳璘以四月十七日上遺表有
旨汪應辰升寶文閣學士權節制兵馬興州制置司分
興元利州作兩路以吳勝任天錫總其軍晁公武除待
制知興元府應辰疾速前去以漕臣權成都已而除虞
允文大資政充宣撫使未幾允文依舊知樞密院再押
治事仍為宣撫使二十日出門

文忠集卷一百六十七

欽定四庫全書

集部

文忠集卷一百六十八

詳校官庶吉士臣李傅熊

主事臣呂雲棟覆勘

總校官進士臣楊懋珩

校對官學正臣李巖

謄錄監生臣李如梓

欽定四庫全書

文忠集卷一百六十八

泛舟遊山錄二

宋 周必大 撰

起乾道丁亥七月盡是年九月

乾道丁亥七月早赴縣廳為大行皇后

姓夏氏
袁州人

六月二

十五日上仙行在進奏院坐省劄牒諸路云禮部太常寺參照顯恭皇后故事皇帝成服七日而除百官三日而除諸道州軍計詔到日長吏率文武官舉哀成服三

日而除又禮例諸路監司州軍縣長吏以下合服四角

係幘頭頭冠亦布

直領欄衫

上領腰經以不盤麻

又士庶各於本家素

服三日而除婚嫁除服後不禁行在自成服日為始諸

州軍候指揮到日為始又邊州軍鎮並不舉哀又諸路

州軍并所屬縣鎮候指揮到日下管寺觀修建道場三

晝夜并禁樂三日又禁屠宰一日又小貼子士庶素服

依禮例係去顏色止服淺淡裏青皂頭巾又省劄檢準

懿節皇后典禮參酌討論外路駐劄諸軍去處依禮例

合就所屯軍處候報到自副將而上成服其餘部隊管
隊使臣并散隊使臣陞朝官以上及將副指揮使以上
並常服哭於本營廳三日而止今欲依上件禮例施行
內沿邊州軍駐劄去處依例更不舉哀六月二十六日
奉聖旨施行

闕

辛丑晚臨訖釋

服而歸邂逅新太府寺丞蘓峴叔子東坡曾孫而過之
孫居潁昌陷敵尚書符奉待時絜以歸今為駕部迨之
後昔東坡買田陽羨凡九百斛三子之裔共享之故峴
居此嘗與武義兄同班改官以錢端禮薦除太常簿
今代太府

關

壬寅五更大雨黎明晴欲追涼顯親而新司農簿張朝
奉觀頤新廣德尉虞廸功松新上元宰吳景先及數客
踵至觀頤侍郎滌之子松尚書策之孫吳宰給事中棡
之孫報謁皆不值至周孝侯廟遂遇顯老顯親祠飯招
莊德邁汪端中共坐彊中送瓜術人朱曉偶至二公欲
報命因試之逼晚歸以酒飲從者作七夕

甲辰婦家為老妻開葦

丙午新豐成李令愿及其堂弟新武寧丞恕新奉新丞

愈將仕郎慙並相訪

丁未大赦到邑具詞畧曰陰雨作難允賴元良之本陽
淫熱疾造罹無妄之災尾詞云康樂安平受祉莫先於
長子淵泉溥博推恩豈限於彛章初皇太子因赴長秋
臨而中暑醫誤投補藥疾遂亟尋聞初九日夜薨

庚戌早過樓真尼庵設考妣以次神位行中元薦享之
禮新監錢清鹽場吳廸功守相訪湖州人

辛亥雨中訪莊德邁奕棊烹鮑粥調煎笋

壬子洞靈邵道士送山藥薦新新善權長老道林相訪
夜大風雨達旦

癸丑旬日來東南風大作未嘗間斷或以為異

甲寅雨稍止過顯親邂逅鮑夢符通判薦相僧正顯
乙卯武義專人來書中云江西一月之間再有水患

丁巳復熱

庚申大廬山禪林禪院長老慧畸相訪

癸亥約早莊德邁德政點心罷同登舟為保安之遊保

安寺名在縣北二十五里今為周敦義叅政功德院午
後到寺殊不稱所聞長老祖廓晚置酒待二客遂宿

甲子點心罷肩輿里餘入胡發運白雲庵有蓮池面盈
丈又半里入胡叅議老壽庵猫兒竹甚大且成林有江
湖氣象浙中不易得也此方大抵皆諸胡之產地多紫
薇花聞如楊柳芙蕖可挿而成又數里至李山游禪寂
禪院未有主者尤荒涼不振按至和中寺記云敍於梁
朝今佛殿造於祥符間邑人以為唐殿非也門外乃常

州官道自李山南行四里得周氏衍度庵甚閎麗又里
餘至虞山福聖寺寺有彌勒殿南唐保大中造甃塼皆
隱起毬路越百年堅緻如新唐人龍朔中作才法師碑
尚存地理僧淨如居寺之瑞象院飯於其房東西二周
氏富蓋此鄉東周有園今不治惟環秀亭在池心環以
荷花坐賞移時登舟而歸過溪值順風晡後至邑塲致
遠樞密之孫主簿君邦彥遣使通問其居號小墟去金
壇八里

乙丑吳廸功州相訪其父寺丞君不主岳飛獄者

閏七月朔丙寅宜興宰正奉議際法藏寺首座祖印大師道堅相訪

丁卯莊文太子以是日勅葬寶林寺

戊辰安術者孫晉臣論予命有透關之語竊取之

庚午大雷雨連日秋暑不可當今日稍涼

癸酉安恭后攢修吉寺

乙亥新青陽主簿陳朝立紀相訪其兄朝舉同年也已

死

丙子邵氏淨觀庵僧契彬相訪

丁丑仲寧仲賢定用香山地是日斬草

己卯午携棋具過莊德邁晚月色清甚同德政泛舟出

溪口

庚辰新監雜賣場門范從事華相訪淳夫曾孫元長之
孫趙元鎮外孫留汪彊中午飯彊中謂酒有五品苦淡
酸臭甜其貶甜在臭之下今日特以醇厚極甘之酒沃

之甚有難色耶為一笑湯朝美邦彥及其堂弟士美國
彥自金壇相訪夜月愈佳常年之中秋也已泊其約德
政過卽園因為泛舟之後臨主而其主人辭以家集獨
與德政乘小舟入湖渾風露浩然亦樂也

辛巳早就顯親具蒲饌待二湯新句容宰田奉議偉相
訪是日再欲過卽園會風雨不果移具過莊德政宅招
德邁而莊德器支使璵適至遂同集飲韓无咎所送金
陵經武堂酒愛其醇美乃以遺之夜御夾衾

壬午留二湯飯

癸未再留二湯飯卽軫方遠相訪德政之妹夫

甲申二湯訪別具飯待之仍和其二詩

乙酉早同莊德邁泛舟至其曾祖通議公墳有庵曰揚
名山勢如城而葬其中蓋程惟衆所卜惟衆見趙清獻
公彈陳恭公文其術甚精通議公本維揚人占籍宜興
既葬而子微登第官至待制今子孫甚衆祿仕不絕亦
多富者其側乃蔣隸叔墳庵曰慶裕規模不為近世之

侈

丙戌食後泛舟度長橋至卽園邀方遠小酌天遠堂荷
花盛開其傍卽吳師尹宮教之園初任昉釣臺在水涯
師尹夷之別築臺於傍師尹近死園已荒而古跡湮為
茭葑矣

丁亥拂旦同仲寧卽方遠過香山觀外舅塋地歸飯厚
山莊氏永思庵主僧覺了回縣雨作長道賴寬恩向寧
都來事全釋追念女兒悵悵以沒痛心而已遣李全歸

報

庚寅湯朝英兄弟遣使送金壇許知觀院道士周汝昭
眼藥云此觀累世傳此藥矣

辛卯新監文思院上界門余廸功汶相訪狀元之曾孫
狀元仕至朝奉郎知兗州云食後同莊德邁步至通真
觀知觀李守寧留飯又步過周孝侯廟觀父子勅告廟
後有大墩古木森然號周墓墩相傳孝侯塋也穿墩過
田氏廢園今屬莊氏連日陰雨御夾衣今日晴復揮扇

壬辰至棲真庵燒香為道者坐化也道者乃張惟濟提
舉之妻與其女皆為比丘尼捺行堅固生而體出舍利
臨死書偈有僧家所難者

癸巳夜吳景先知縣家遭刼凡二十餘人持弓矢刀戟
而入其所居在婦家東百餘步

甲午拂旦同邵方遠出南門過王進修道家獻石碁
一副張公洞泥所造也進至香山與賢仲大悅飯芟舍
遂過湖莊西行三里至孫仲益故庵修竹流水門徑幽

深似其胸次丘壑也龜潭形如龜澗不盈丈有亭曰酌
淹而庵名千息對祠堂創一龕華甚設四几案為其二
室一留自待又西南行二女訪玉女潭潭在四山中三
面皆石崖有竇上達水浮墨色可畏投以物則盤旋而
下唐權德輿李幼卿獨孤及皆有詩自此東行里餘呼
茺兒導至佛窟岩岩高一丈五尺澗數倍水出其左或
云自玉女潭來流而為澗石佛數身軀幹皆斷或云像
出岩中土人神之多求嗣焉其毀之必以不驗也又西

南二三里由王直中知軍家墓道出支徑訪龍潭伐篠
制荆望石岬而進有蔣天成者得其地樊以竹木路不
可行惟樵叟乃能至石壁四插其高十丈潭在其中長
六丈濶五之一真龍湫也窺觀毛髮森竦回顧蔣庵不
遠會日晡歸飯于息庵投宿洞靈知觀邵惟道置酒秉
燭過聖堂觀元豐間劉宜夫及元祐辛未五月僧仲殊
留題然後寢

八月朔乙未早至前知觀應若谷房賞秋香又訪道士

李繼彭觀中有仁廟時賜度人經一藏今漸散失歸至香山少休遂入莊僖簡公神道長松夾路殆五六里由徑過單時中主簿墳庵訪白鶴洞水自中出令從者側入以望云相去二三丈復有洞濶數尺聞過此則平廣道人輩採石脂於中云復出舊路行里餘乃至僖簡追遠庵主住淨照來迎飯罷留題而出停午至橫澗折而東二里許抵川步訪所謂洞山者高二十餘丈周圍三里形如張弓其上皆叢條無他異洞口流水清澈覓輕

舳舻其中夾以炬火掉而入岩石色正白中為裂罅
謂之石脊石岸如削玉如砥平如剗刻詭異不一鵝管
鍾乳往往可取石燕遇火驚飛撲人行數十丈頂稍高
而洞寬俄值深潭卻生懼甚趨歸或云自此而進可陸
行半里有石橋石磬之屬唐人刻姓名在焉此洞惟冬
涸可窮覽若積雨則水與洞平不可入今日僅能入也
晡時過長峴嶺入莊刑曹報慈庵賞木犀遂歸是役也
岩洞有邑南鄙者十得五六道士輩且不知所在況遊

客乎尚有大成君陽洞期異日訪之

丙申郡守錢立道監丞送磨勘文字來并致書籍及凝
露惠泉酒

丁酉早訪客不遇謁果利廟廟神乃後漢袁令玘今封
嘉應字人侯碑殊可觀正祠本在邑南銅棺山初曰荆
南山相傳袁令將死天下銅棺如王喬玉棺然故曰銅
棺又名君山亦謂袁君也有林養素者以失音自號不
語先生有問災福但使呪筆書姓氏甲子即一再嗅之

信筆書偈頌今日相訪其語頗文而主於修養至於災福則未必驗也

戊戌社日雨連日蒸渠故也夜西鄰氏遭暴客

已亥早有懷子中以周易筮之遇无妄之益林養素傳
呪云靈寶藏經載汝之名有五鬼名曰攝精吾知汝的
速離吾身太上律令汝化為塵急急如太上帝君律令
勅臨睡時面北叩齒念七遍就寢乃無失王仲謨至自
崑山

庚子早過香山以酒饌犒匠人及役夫飯罷同仲謨自橫澗西行四五里訪靜樂寺荆溪尊者湛然此地人傳天台教建中三年沒是日冒雨行小徑意寺可宿而破落不堪其憂留題而去常日在邑中望銅棺山甚遠今寺後一峰正倚山脚非好事不能至莊子上知府庵欲循舊路復出橫澗會日向晚問土人得捷徑號使嶺既登峻甚仲謨窘於躋攀從者又畏班寅予不恤也一上約三二里乃得平頂俯視縣郭僅成聚落隔湖及衆渚

一一可指眼界廓然雨後下嶺尤險幾不能容足過西
石亭梅樹滿林邑人游賞處也至山門始出大路暮夜
抵郭內

辛丑唐致遠百二姨自平江來

壬寅命通真道士為外舅作緣事

癸卯王仲告及其姪榮仲自崑山來

甲辰晴便覺微暑郁舜舉王仲顯李良佐皆至新海陵
簿尉蔣迪功方慶相訪舜容提刑之子末後約致遠過

莊德政同度周橋訪後漢許太尉墓道中有古翁仲龜
趺披荆莽至其下大墩相連漸為邑人斲掘有碑側立
字多磨滅惟其前十餘字粗可讀大畧云夫人會稽山
陰人姓劉氏蓋太尉之婦也談馬礪畢玉田數七之碑
十年前猶在今為邵氏取去邑人張駒考證頗詳是日
仲寧兄弟會予客三盃後出雙練謂之表坐沂俗也

乙巳婦家會親姻謂之宿集表坐如初

丙午鼓外男之柩登舟未時至川步登陸雨驟作申後

至瑩所

丁未大雨大悅開穴深丈有五尺積雨泉涓涓爰舍漏
下泥不可居同范至能魯子師李良佐投宿洞靈觀簷
溜如灘聲

戊申昧爽至香山送葬者畢集而地已不用矣雨晝夜
不止

己酉仲謨從諸人議柩暫寓洞靈既至而晴遂為佳中
秋過至溧陽

庚戌婦女歸邑觀側百餘步一峰壁立狀若鐫刻紹聖四年有遁形而入者故號會仙岩岩下流水可浮盃今有小亭午後同致遠西南行里餘訪白馬洞將至澗水淙淙有聲其源出洞中入洞頂如砥平鞠躬而進觀沈遼刻字歸訪道士朱有中生於元祐辛未年七十七矣夜月蝕觀係何名坐落何所當考之

辛亥早同致遠正應德愚肩輿西南行過黃家橋入湖狀度侍郎橋再游惠園其眷眷以此者以古澗碧流也

又行十餘里登王搃管墳纔二十年已復荒蕪進遊大

城洞

俗號萬猪

單氏風土志謂洞門狹隘止容一人行內頗

寬曠有鹽米堆白石高峙如雪山狀洞中有四際水流

今殊不然入洞纔十步為村民以土窒之前日遣人闢

治僅高一二尺以草為茵魚跳而進又行十餘步大石

相倚中有深谷寸步滑磴且視且恐已而稍寬廣石乳

如寶蓋垂於其上傍又有一谷然不若前洞之險稍前

即大坑窞乃近歲崩陷者所謂鹽米堆雪山不可至矣

炬火欲盡遂出憇村民吳氏以茶果交相遺歸入饒州
太守蔣天佑垂裕庵半里至君陽洞陸希聲云在君山
陽故以為名洞去龍潭甚邇水自洞口出行兩崖間清
駛可愛天日下照不必秉燭視他洞為勝惜乎天祐之
兄營墳其上不復為游觀之地矣歸過金沙致遠獨遊
停車以待同飯洞靈抵暮還邑凡宜興南鄙岩洞搜索
殆遍惟圖志中載武陵洞在龍山去湖狀渚南十里中
若張公洞石乳凝結有幢幡羽蓋之狀又有瀑布逆流

但榛蔓蒙密人跡罕至不能一往而南岳山稠錫禪師
道場古跡頗多且鄒志完所樂去縣二十里而近竊未
至焉既迫南歸須俟他年矣夜雨復作

壬子范至能自漂陽來

癸丑以卮酒餞至能送之北門

甲寅裝船

乙卯仲賢護外舅之柩歸崑山卜葬仲謨仲告榮仲偕
去同安人送至溪口

丙辰陳尉愉相訪即求仲故監鎮之子

丁巳數日晝夜雨渰田已十分熟今遂敗之婦家置酒
相餞

戊午早發宜興纔數十步大風雨不可開轉溪復回唐
致遠小舟先去

己未風雨不及沂湖渰甚遲滯入夜僅行六十餘里泊
楊家舍

庚申雨止早至溧陽縣泊金淵亭

事見吳越春秋宰陳朋元丞

趙宣義師旦簿錢廸功聞詩尉時廸功作人新辰倅秦
煇庠用相訪秦惠長書及文編楚材大資政之子也劉
季高侍郎至此方數日年八十一近卧病而精明如故
謂閻德夫即彦照留致遠飯

辛酉晴彭慶携磨勘朝奉郎告身來至縣治登綠淨亭
可望湖山視田疇求季高作罔極庵額季高二子右通
直即淪右脩職郎治季高云靖康間錢蓋以雜學士為
陝西五路制置使調兵勤王而置司長安既次陝府太

守不以節制待之蓋詰責則云五路自謂涇原環慶秦鳳熙河鄜延初不與永興軍路也蓋乃具奏詔改鑄陝西五路及永興軍路制置使印其迂如此時范致虛左丞守長安初亦尊王人用申狀而蓋用劄子如他路致虛大怒奏乞本路自勤王不隸蓋後卒無功或謂舊有從官使河北徐處仁亦以前執政尹大名用申狀使者戒史云大名府回牒餘則劄子人以為兩知體焉顧綱獻筆李高甚賞其藝數為作詩帖網求跋與之以思堂

飲羣用致遠

壬戌早諸公相別即行致遠送數里羣用追送集字周

易碑去縣四十里有貞義女廟

女姓史

李太白作記題云

瀨水上古貞義女碑銘并序前翰林院內供奉學士隴西李白述其末有跋晚抵黃連步遣江陰坐船歸

癸亥蓐食泊裝凡九轎五車十擔已初方能行前日在溧陽以輜重寄魏聰之舟者猶不與焉行十五里飯分界潘氏午飯官塘薄暮次溧水彥平與邑丞朱文林致

知尉郭廸功永相候尉廳有後漢校官碑尚完李野夫
公擇兄弟嘗讀書於此有亭廢按宿中山驛赴彥平會
夜分歸治飲酒

甲子雨昨日若爾狼狽甚矣陳德新教授及常熟丞秦
煒耀元相訪煒棣之子晚赴彥平甚勸

九月朔乙丑陰早招陳德新教授飯晚赴秦耀元會飲
木犀酒庭下有雁來紅即藿也丹紅可愛夜雨

丙寅早雨止絜家游茅山出東門二十里飯張野坊又

二十里少休天王院微見日色又二十餘里至茅山鎮
又里許入崇舊觀句容尉郭彥和都道正知觀事兼管
轄本山諸宮觀謝元真山門道正同知觀事吳守卿山
門副道正簽書觀事卜誠全相候嘉祐中知句容縣陳
倩校脩句容山記云觀對華姥山本陶弘景華陽之下
館唐貞觀九年立觀本朝改今名兵火焚蕩之餘檜復
修之晚置酒三行遊人至例接待云按記言大茅山在
崇壽觀獨高處中茅在積金峰北獨高處小茅在闕

大茅君諱盈中茅君諱固小茅君諱衷是日行道中望岡阜西南來勢若連環既赴三茅而北馬上口占云千峰溧陽來勢若西南犇遙拱三茅峰不敢迫至尊三茅如軒縣次序儼弟昆正西闕夷塗羣仙之所門至今下洎宮往往弭旗幡此山之大槩也

丁卯夜聞雨聲平明遽止挈家游山北五里入新剎白雲崇福觀紹興壬午太上賜額道士王景溫主之山勢環抱右倚白雲峰

自此登中峰

左帶龍山及石培峰前對赤

山望之如以巾褰覆冠其內卽湖也又二三里至三茅祠宇宮按記云在中茅峰西側天寶七載立精舍今之觀宇甚平常頗有宣政士大夫如李彌大輩題字知觀黃見正濮州人次上昇元觀本在山頂建炎間移此望大茅峰在東南次上昇元頂謁白鶴廟按記云漢永平二年立殿下有壇卽三茅君飛昇處壇松已半枯右廡有小軒望川原甚廣自廟下嶺至大羅源按記云在中茅峰之西此處有清真觀每歲觀會必設御齋上登極

罷之諸觀皆有茅君像而此觀獨異棟宇亦樊陋惟新
創玄武殿甚偉酌丹砂泉出門路叢條訪卧龍松根盤
如龍枝如覆屋嘗有道人結庵其下時覩巨蛇出溪遂
去之又入山一二里入張椿齡凝神庵庵坐中峰殿亦
對赤山而湖稍偏其左即白雲峰隔峰即崇福觀其右
即小茅峰也椿齡字達道太上數召見賜御書衣服白
羽扇今上亦賜御書扇而時椿齡傷足不能行戲作小
詩云仙師足厭踏京洛亦復懶慳茅峰鶴遺形聊示德克

符閉目定從陳鉄脚次入黑虎谷訪劉蓑衣庵坐小峰
對中峯蓑衣恩州人與語正而不夸太上嘗召對賜賚
皆不受冠履質樸異乎張君自此復下山行官道歸飯
崇禧日已過午往復約二十里飯罷東行過西楚王澗
記云楚王立寨得名入五雲觀記云在華陽洞西本王欽若置道
館欽若死其妻請立觀景祐元年賜額晏殊撰記便道
至玉柱洞深數丈中有石柱篝火一遊而出數十步間
即華陽洞張方平諸多人刻石洞門其穴縈紆側身膝

行乃可進纔二十步水自中來伏流在外為間遣從者
踏水百餘步得受籙人所授竹簡而回其源未易窮也
由小路小元符宮依積金峰對大茅峰稍偏而以五雲
峰為案昔王畧劉混康相繼居此落成於崇寧凡數百
里間地勢極高未至四十里已望見其室宇兵火無孑
遺楊存中妻趙氏復葺之視山後堦城殆未及其半然
壯麗已甲宮觀矣都轄徐知宮賀從道置酒不暇留相
導西過天聖觀觀在積金峰之上正對大茅峰記云梁

天監初陶弘景遷龍子於此養養本朝祥符三年迎入
內尋歸之池在殿下深數丈其水湛然旱歲輒請禱予
已卯春任教官時張子公迎致祈雨甚驗今有一二在
盆中以示遊人云復回元符宮下華陽橋觀陶隱居丹
井其下泉流感沸是為楚王東澗度橋陟華陽宮亦對
大茅峰記云在積金峰南華陽洞西本陶弘景之上館
天寶七載立知觀李友文澗之西岡人出自唐景皇帝其
族頗盛譜牒不絕收唐告尚多往時搜訪江南李氏之

後而州縣屢以友文族人應詔久之不報豈以知誥妄
引李氏譜耶次入棲真觀記名玉霄庵弘景華陽之中
館本朝賜今名弊陋之甚日已晚由小徑歷鄧都山山
骨皆石或云舊有太乙救苦天尊殿博州人王若寧守
之又數十步至余都正庵死十餘年亭館摧毀廢沼殘
花而已此崇禧之便門也自五雲觀至棲真相去甚邇
日短道險故忽忽耳夜大雨竟夕

戊辰拂旦乘筍輿登大茅峰凡十八盤乃至其巔北望

中峰西北望句容西南望漂水正東望金壇惟正西皆平原予詩所謂羣仙之所門也上有太玄殿以了頭為外案方山為內案殿前有小池殿後有石壇嘉祐以來張環諸名士皆刻姓名雲飛氣欲雨怱怱下山入太玄庵登八仙殿下池號喜客泉感沸殊甚水流為澗入崇禧給烹煮灌溉歸崇禧方辰巳間乃挈家再過山北約十里許路傍有塼堠刻云崇玄翊教真人陶隱居瘞劍之地其後十餘步田間有石獸二即隱居墓稍前即

玉晨觀東對雷平山前有大池名郭真人養龍池及許

長史丹井

徐鉉銘并書

入門有二壇其左即長史壇刻云貞

白先生立其右是隱居埋名壇也東廊長史手植檜甚
圍丈餘西廊左紐檜圍八尺三清殿後沐髮老君像甚
古觀後有風門泉近歲士人曾恂重述山記比陳倩所
校舊記頗詳觀有其板并古碑十餘最佳者隱居新帖
長史舊壇館碑隱居撰并自書數十字又立靜先生碑
柳識文張從申書李陽冰篆額號為三絕又顏魯公書

又唐太和七年十月四日禁山勅署勅使相七人一日
太傅兼侍中一日太保平章事一日司徒兼侍中並不
著姓餘四人劉段牛李也秉政者三人右僕射平章事
不著姓赴太清宮中書侍郎平章事李德裕門下侍郎
平章事路隋並書名而不押字謾記舊制其無姓名者
唐表可考也呼匠摹一二碑及三茅君像償以千錢自
觀西過靈寶院

陶隱居所居或云即昭真臺

有瑞像老君殿

興於開元殿

前有周真人養龍池道士王宜言字子誼號王自在年

七十汴人徽宗屢授道官不就壁間掛歐公小草秋聲

賦歸寫亭詩知予居吉欣然見畀其徒陳姓者饋眼藥

飯罷東南行二三里入燕洞宮

記云梁普通中晉陵女錢氏得道於此至今女

冠居之

洞在宮南半里大石錯立一石橫壓洞口窺其兩

傍蓋深窅也或云道人有繼而入者又稍南即錢真人

誦經岩岩在平地三面如圍屏西南其響真人誦黃庭

經於此石上略類所倚之迹云知宮吳至道言茅山多

盜親嘗被劫道人輩有遭屠剥者尚有抱元觀乾元觀

丹沙泓遠者四五里近纔一二里而雨大作從者咨怨

遂回崇禧獨登華姥山謁孫仙姑廟

記謂仙姑名寒華孫權孫女

是

行也山之東周覽無餘山之北再至而遇雨山之南自

崇禧五里至分陰泉大茅君洞二里至八卦臺陳待制

扃菴在焉又二里至慶雲洞又二里至潑墨池復回四

里至金牛洞次一里至南華陽洞及崇壽觀有撫掌泉

九錫碑次出大路至南華陽觀道士所言如此既未暇

往不復考證夜道正吳守卿置酒雨中藝黃連香命處

中鼓琴黃連香青精飯山中絕品也

己巳挈家冒雨發崇禧飯天王院晡時復至漂水別邑
官登舟而天氣稍晴漂水發源東廬峰迂曲淺狹冬涸
不可行舟凡八十四盤至烏折橋乃深濶入金陵城是
為秦淮

庚午晴周旋方山者幾百里晚距府城三二里止夜雨
卒未陰早入上水門泊天津橋時方務德被召去史志
道未上謁韓无咎運判華夢錫總領周仲應通判拜三

十姨襁褓中相別於九江四十餘年矣留飯而歸移舟折柳亭下徙寓大舫中

壬申雨霽御前諸軍副都統制武功張大夫榮府倅嚴承議煥文子袁奉議惟一教授何承議作哲簽判魯通直璫察推丘文林宗山左司理孫廸功革右司理林修職宗文上元宰魏宣教楫江寧宰陳宣教崑主簿錢廸功永存威武軍承宣使張淵軍器監丞翁子功新南城主簿陳大朋府學正夏融學諭蔡瑤士人張光祖朱符

鍾大聲經緯吉安世讜論相候同家人赴周姨夫飯罷
報謁衆客過戒壇院上廬舍那閣其高九丈五尺中山
僧初故所造次致保寧上覽輝亭觀諸軍呈馬晚赴府
會

癸酉方懋秀才來求逋監牒於倅廳廬陵人也早府會

登高於南華臺

癸未歲陳阜卿一新之榜曰總秀

韓葉張侯與予凡四

十客酒間月出臨臺奏軍中樂命妓李素胡舞坐客皆
引滿歸而大吐

甲戌莊德全約飯不果赴郭輔世推官即明叔內翰孫也

乙亥諸軍大閱辭張侯之會與翁子功過蔣山禮寶公酌八功德水訪定林定在蔣山鍾山之間有務觀乙酉七月四日題字為續其後云丁亥九月十一日務觀之友周子克陪翁子功來游子功蓋往時扶病招務觀者怯雨留塔下今復為東道主但恨欠此佳客耳蔣山長老正恩法嗣果恩禪風孤硬號恩鉄脚有功於葺寺

而向所謂楊善友者今披剃名法才其妻已死獨哀數十萬緡再造三門云飯罷由山路訪草堂即北山移文者蓋蔣山之尾也舊有寶成寺婁約法師講經臺大井及他遺跡尚多近為楊存中毀去別築其大父宗閔坟寺額曰隆報又立廟於寺側亦賜勅額殿宇極侈營造猶未已古跡為之一空太息而歸循覆舟山過行宮養種園望屋瓦鱗鱗子功欲同遊閣上遊止遂復入東門子功有會不果赴同周姨夫赴張晞顏太尉晚集年七

十三尚蓄十姬有秋香者府中號雪婆婆善酒戲四鼓
後歸

丙子晴漕司主管文字趙承議不怯同年也幹辦公事
范宣義同密之子主管帳司趙文林師炳保寧長老行
舒天禧長老智勤及蔣山恩老並相候兩司已供張賞
心亭餞別俄報勅使王官來閱軍實遂散携家登覽而
歸人事擾擾解舟已申時便颿行夾中宿板橋

丁丑風正揚颿甚駛晚泊采石夾中

戊寅午時入姑熟溪水色紺碧與河流不相襍泊舟閱
武亭下太守吳明可給事通判朝秦任大夫望之教授
沈迪功瀛判官施文林堅錄參趙從政伯弼司理蕭從
事利用司法陳迪功邦度司戶呂從政濱知當塗縣王
宣義權丞任文林三傑尉楊迪功鉞知繁昌縣陳宣義
文寧國軍簽判王承議杞並往復沈教授任丞出北門
五里餘登凌猷臺臺在黃山上本不高而望甚遠西南
即青山却顧采石天門及溧陽和州諸山皆在目中楊

次公詩云大明七年暮冬月宋武南巡立雙闕鑾輿先

幸凌猷臺雲中簫鼓奏春雷六龍一去晚無跡山花野

鳥空相憶翠羽鳴鞭來不來景陵芳草年年碧

許渾集亦有詩

臺後本有精舍近歲太周敦義移於山下尚有塔存焉

與二君小酌會日暮下至寺中其

闕

即東嶽宮頗嚴峻

門立元符間石刻月出還舟盛秀才旦携詩相訪

已卯赴州會於涼堂酒名晏堂并姑熟春羣妓凡陋不

稱歐梅風月也城上有亭西南望龍山去城十餘里相

傳孟嘉落帽處明可云嘗訪山無誨容之墓況非江陵
乎又云辛巳采石之戰水軍統領盛新最有功而人不
知今死矣

庚辰人事擾擾已時方能行未後至大信港口東風作
遂登舟東梁山峻甚

辛巳未後過下驛磯

一本作解葉磯聲之轉也

舟人放簾稍緩幾觸

石背賴永新客舟艤岸以篙拒之而過其勢甚危聞沂
流最畏此磯晚泊蕪湖縣吳波亭宰沈約之相候按圖

經縣即春秋左氏傳楚子伐吳克鳩茲今謂之臯滋亦曰臯夾輿地志云縣東五十里曰臯茲是也宋齊志淮南郡有湖縣故通號於湖去太平州六十里

壬午尉趙修職不疾相訪同年不病之弟也過張大王廟入西能仁院破敗無足觀又過東能仁院亦破敗圖經云本名古城院即古宜春縣城寺後有墩褰裳踐荆棘而游焉飯罷出上東門北行九里訪赤鑄山高十丈周回七里舊經云楚干將鑄劍之地干將被誅後葬古

宜春縣即此地其坟見在寰宇記云復父讎三人以三人頭共葬今村民指其傍一山號神山山塚多石有泓坎相傳為淬劍之所又有足迹如進步登山者他無所考北行過赭山有舍利塔四級登其半而歸道游吉祥院及寧淵下觀十五年前皆嘗至焉是時未為觀道士一二人植花木於小軒榜曰壺春近歲蠹蝕之觀不可居始以此為下觀棟宇日葺而壺春廢矣晚赴沈約之會聞荆下在縣東南十五里高二十五尺周回九里舊

經云卞和得玉之所今出寒水石隔江而遠不果游淮

亦有
荆山

癸未早沈約之携詩編來別遂行晡時過三山磯亦險
晚泊月子港連日無風行甚緩

甲申早北風作午至繁昌縣陳宰及太平州推官慕容
從政邦孚主簿劉迪功孝稱尉丁迪功輒並相候登岼
報謁草廬葦舍僅數百家道游寶山寺破屋破僧無足
觀聞縣後有縹緲亭景物似凌敲江行望見之貪掛颿

不果往又去縣六十里有隱靜寺梁杯渡禪師道場計
三日方可往復亦不果游乘風過返秦磯入丁家夾宿
三月十九日嘗泊此正七月矣再呼謝鎬飲以酒

乙酉子後乘月揚颿出夾過銅陵縣不泊未後拋北岸
避陽山磯晚復過南岸日落泊梅根港前時順流自此
至丁家夾今者沂流西山程無差賴風力也是日舟中
有三樂遇順風望九華讀笠澤叢書

丙戌風力稍緩午入清溪溪水碧色泊弄水亭入門即

池州州治謁太守同年趙朝散彥博富文提舉常平李
承議子長通判陳朝散璘同年湯平甫知縣適在此

丁亥都統制寧國軍承宣使時四廂俊及其子閤門祇
候政貴池宰趙宣教符司戶袁廸功祖嚴趙修武公頃
並相候約湯平甫共飯同度陳公橋洩水橋秀鮮橋遂

至齊山

記云山東西廣三里有十餘峰其高等
故曰齊山或曰唐刺史齊映有善政故名山脚

插入清溪石色青蒼畫洞穴半出水中泛舟扣其戶而
返步登延慶院以舊僧慶先為指南環寺岩洞可愛者

羅漢殿後曰妙空岩在大石中次曰丹砂岩俯樓乃可入片石斜出叩之聲控控然四傍屈曲皆奇石也法堂之下蕉筆岩亦名唐公岩

張環字唐公嘉祐三年司法以蕉為筆書岩故云

有黃大臨諸人題字山之上曰春流泉進窺無底同歷武功岩遂至觀音岩岩本名上清兩岩對起三面環抱有程正輔蔣頴叔題字右轉登寄隱亭四面皆翠石有小岩刻寄隱岩三字其前有熙寧甲寅重陽太守劉數思甫題名東北乃紫薇亭故基

謂杜牧之而淮南諸山下臨

秋浦清溪直接大江眼界豁然又其傍拔起數峰奇甚
謂之小九華蓋與上清岩皆齊山最勝處也崎嶇行硤
中僅可通人稍前曰定力窟深不可測又其上即翠微
亭是為山頂杜牧之云江澄秋影雁初飛此地此時也
東望望碧峰劒立於遠山之坳者九華也南望大山橫
陳者大婆山領綠峯也北眺州城邑屋可數大槩主山
自紫岩蜿蜒西來其左即貴池口其右即清溪秋浦望
之全類臨安之西湖而一堤隱然屬城亦類蘓公堤此

又登覽最勝處也予賦小詩云地占齊山最上頭州城
宛在水中洲蜿蜒正作長虹墮吸住江河萬里流又云
天遣江山助牧之詩材猶及杜筠兒向來稍喜唐風集
今悟樊川是父師久之由別徑下九項洞上有九項圓
如盆覆中頗平廣有磐石可坐嘉祐中因太守王哲易
名集仙洞哲與王介甫唱酬甚多即撰齊山記者洞後有穴側身可過
一小洞也竇穴上穿頗類月岩而其背山上乃唐觀數
郡基王哲易名青霄亭今亦廢其下曰獨秀岩翠壁橫

時可愛訪左史洞為馬軍寨所限出寺行里許乃至馬
竇寺之後山也其深數丈可達於外左史謂李方立景
業也杜牧之代景業來守故為立名而張祐書之又有
石燕洞大抵皆石也游已還寺再登翠微亭置酒伺候
趙守致饋平甫賦二詩予次韵云上清別殿舊通明仙
聖飛騰戶不扃出郭尚疑牕列岫絕堤始露岳真形奇
奇怪怪無非洞下下高高總是亭但把酣醺酬絕景天
風吹面徑須醒

其一

相君早日翼天飛晚落江湖罪以微

好事一時開翠壁佳名千古記黃扉

舊記映麗相後嘗歷江西觀察史池

舊隸江西則此山因以得名不為無據但不當言刺史耳

朝遊要見鵝翻樹夕返

何妨螢濕衣更得湯休奇絕句後來誰憶謝元暉訪沈遼雲巢人無知者甲夜歸

戊子早至郡齋中和堂登蕭丞相樓復游景德禪寺訪見山堂為添差路鈴王宗所占排闥造焉次過天慶觀讀徐鉉碑李煜紫極觀也已後赴提舉司會荷池中有秋浦堂頗幽爽會散出北門二里登貴池亭俗呼望江

亭以其見江可望淮南也亦見九華諸峰亭久廢今方
重立歸上南樓南門城樓也正對齊山循城而東有拱
翠樓亭又稍前即九華樓三者相望皆下臨清溪遙見
九華大抵為大婆嶺所障不能盡見諸峰大婆山極高
而其名不典圖志亦不及之富文送菊酒與骨肉小酌
於南樓夜歸弄水亭易提舉司坐船至隆興

江上錄自
金陵至蕪

湖二百三十里蕪湖至池州三百九十里池州至湖口
六百五十里湖口至南康軍一百里南康軍至隆興三
百二十里

已丑教授陳文林師正總領趙承事闕量相訪赴州會

坐中見梅花賦小詞云踏白江梅大都玉斲酥凝就雨
肥霜逗癡騃閨房秀莫待冬深雪壓風欺後却仍怕伊
僝僽營妓曹盼頗潔白淳靜或病其訥而不頗戲以況
之乙夜富文出家姬小瓊舞袖翩翩徃聞范至能云頃
朝士姝麗有三傑謂韓无咎晁伯如家姬瓊也禁中亦
聞之又作小詞云秋夜乘槎客星容到天孫處眼波微
注將謂牽牛度見了還非重理霓裳舞都無誤幾年一

遇莫訝周郎顧富文近再黜有所競而設榻於外時方
為兩解故戲之如此

庚寅早欲之九華而雲夢宋宰肱及歸州助教張蒙正
相候過午乃能上馬時候差忠訓郎趙良弼等同行五
十里至鐵券山投宿葉蒼秀才家華屋修椽藏四山中
蒼有子楠登進士第新鄱陽尉山深夜甚寒

辛卯早再赴葉君飯乃行尉亦並轡二十餘里至青陽
縣令成文林雲丞從政實襄主簿陳朝立巡檢程同

光祖來迓館於驛中尉廨即宋齊丘宅其傍對九華而丘之墓在牛心山下去縣東五里赴陳朝立會以能仁院為廨傍有妙音院同誌縣學登經史閣望九華紫翠千仞造物融結奇巧真尤物也前青陽令右奉議郎楊元稟者極有吏才學舍乃其所葺云舟泊大通鎮陸至青陽纔五十里又云縣東二十里有潮其大如卓面而石穴極深日三潮每潮魚蝦輒先出

壬辰早同陳簿葉尉趙忠訓出郭十餘里登雙練亭度

西洪嶺入龍安院自此徐行歷永安塔虎跑泉過石龍口虎跑嶺此兩處地勢稍高望雙峰九子甚奇遂入廣

修院去縣已二十五里院宇頗雅潔寢堂望雙峰

遠望如雙

劍者此二峰也間最高

情峰真人峰蓮花峰是五老峰步至上雪

潭源高而遠仰視蓮花峰正如所倚之屏其前即石門水所注也峭壁削成懸十丈怒濤駭浪不減三峽或瀦為深淵或散為奔湍雷轟電擊約二百餘步為下雪潭其間多大石水平布者數丈潭中產石斑魚不常流有

瓔珞泉水跳石上如貫珠尤為奇絕而土人不貴也食
罷轉山而行終日觀山面殊不厭約十餘里入無相院
有觀音閣對峰巒數重留題而去又二三里至協濟廟
廟神兄弟二人日方晡或謂化城遠不可到遂止陳朝
立置酒坐中人請下九華溪踏石涉水以為戲葉尉體
肥甚獨墮水中溪自龍池來欲訪其源或云去路太遠
惟禱雨乃至今蕪穢不治不果行終夜溪聲如大雨可
聽

癸巳早循溪而入至亂山環合處登化城嶺巔峻窄時
時回望諸峯層出殊快心目少休半山亭已時至化城
寺寺宇甚佳唐時新羅王子金地藏修行之地又賦詩
云汪波綠壁化城中客愠奴嗔我亦慵及至龜山還一
上為憐高閣對雙峯寺僧善修年八十六贈以詩云老
僧九十視耽耽二十年來不下山我得九華克法供亦
能禁足老山間日尚早愛其景物遂宿焉

甲午早下龜山行十餘里入聖泉院在院側石岩下號

無底泉試之僅二大盖游者未嘗測其淺深耳水自岩
出甚清駛中有五色石飯罷即行過慕善鎮回望九華
橫側高低無一同者又五里至曹溪寺又五里至覺安
寺五溪合流於此故又名五溪寺有王子尚樞密紹興
六年赴湖北師所題詩主僧自全善課令占二兄綱運
約八日有信又五里入大路過鐵券葉元質別去又二
十五里投宿馬牙酒坊二三里有常安寺夜不果往陳
朝立自青陽致餽是行自西洪嶺入山盖西南也終日

觀山面既至聖泉蓋自西北而出所謂山之東乃山背
手植松兩株根株亦不甚大但供結子耳數年前一株
方枯有王健知縣者文正公旦之後作普同塔且誓他
日歸骨於此亦篤信釋氏者也飯罷謁金地藏塔又在
寺後突然一山常時可望大江是日適為晴嵐所蒙僧
祖瑛獨居塔院獻土產茶味敵北苑陳朝立以翰先歸
邑同葉趙行二里訪龍女泉其傍乃李太白書堂基今
為張氏墳地自此下嶺過苦竹院俯視羣山左右對列

中有平田氣象極好稍前即寨頭蓋建炎間張遇寇青陽縣官移治於此真關隘也行近懸橋雙瀑自石山對瀉未經名人題品故無聞焉又行至唇盤嶺而化城峰矣化城九華最高處蔣穎叔嘗有悔遊之語俗傳十里殆不止此賦小詩云攀蘿度險健猱猿石角鉤衣屨盡穿莫訝只尋金地藏也曾徐步玉堦前又數里至龜山一上復數里尤為險峻有崇壽寺慈民閣對雙劍峰聞有廣福寺僧院甚佳而從者猥衆頗不自由不無遺恨

文忠集卷一百六十八